

2 Korin

Korin niŋ Yesuyen alya bereya hitte Pol belem asam sopte kayyin

1 ¹Ne Polbe Al Kurun belem dufayminde Yesu Kristuyen mere basan al aposel hiyyen yen hoy niryin. Ningeb nebe den Korin taunde nin Yesuyen alya bereya sios Al Kurun belem doyan dirde hi goya Al Kurunyen alya bereya Akaia nana bana han mar kurun goke meten kadne Timotiya dufay unken po irde asan gago kan hime.

²Adoninin Al Kurunya Doyan Al Kurun Yesu Kristuya belem buninen dirde igin igin dirde bitin yisikamke igin hiwon yen nurde har.

Pol belem Al Kurun igin nurd unyin

³Be, Doyan Al Kurunninin Yesu Kristu Nani Al Kurunbe alya bereya buninen yird yird mata gote min al, irde al bin yurum yird yird mata gote min al wor po. Ningeb Al Kurun goyen turun irde hitek. ⁴Yenbe nen belem kanduk kurayen kurayen bana hiteke bininin yurum irde hiyen. Gogab yen belem dirde hiyen gwahade goyen po, nen wor al hoyan kanduk kurayen kurayen bana han mar goyen epte bin yurum yirde hitek. ⁵Fundinde, Yesu Kristu kanduk karkuwan yenen hinhin gwahade goyen po, nen wor kanduk karkuwan yenen hityen geb, Al Kurun belem Yesu Kristu bin yurum irde hinhin gwahade goyen po, nen wor bininin yurum yirde hiyen. ⁶Ningeb kanduk yenen hityen gobe bitin yurum hen henya Al Kurun belem den goyen dumulgan ten tenya goke tenbe nen kanduk yenen hityen gogo. Al Kurun belem bininin yurum irde hiyen gobe den wor bitin yurum hen hen ge ten gwaha dirde hiyen. Irkeb den wor kanduk karkuwan nen yenen hityen gwahade goyen yenen hanjen goyen goke mukku ma ten goya goya taren po hen hen ge pinen ma hen hanjen. ⁷Ningeb den ge heken nurde hite. Nen gayen kanduk karkuwan

yenen hityen gwahade goyen po, den wor kanduk yenen hanjen geb, Al Kurun belen bininiŋ yurum yirde hiyen gwahade po, bitiŋ wor yurum yirde hiyen goyen nurde hityen geb gago diniŋ hite.

⁸Be, kadne yago, neŋ Esia^a naŋa bana heŋ kanduk karkuwaŋ yenen hinhet goyen den wor nurwoŋ yeŋ nurde hite. Neŋbe naŋa goyen bana heŋya kanduk yenen hinhet gobe karkuwaŋ wor po geb, fole irtek metenŋ wor po dirde hinhin. Irkeb kamtek yeŋ nurde hinhet. ⁹Fudinde wor po, neŋbe bininiŋde mat wor po al belen mudunke kamniŋ tihit yeŋ nurde hinhet. Goyenpoga neŋ hitte mata gwahade forok yiriŋ gobe neŋ belen nindikenŋe saŋiŋde ma metenŋ teŋ al kamtiŋ yisaŋ heŋ hiyen al Al Kurun gote tareŋde metenŋ teŋ ge teŋ kanduk gogo forok yiriŋ. ¹⁰Al Kurun gobe neŋ gayen kanduk kurun bana heŋ kamniŋ tihit yeŋ nurtiriŋ goyab faraŋ durde dumulgaŋ tiyyiŋ. Yeŋbe kame wor gwahade po dirde hiyeŋ. Niŋgeb yeŋ belen kanduk bana mat hugiŋeŋ faraŋ durde dad siŋa dirde hiyeŋ yeŋ nurdeb yeŋ ge po hekkeŋ nurde hityen. ¹¹Goyenbe kanduk bana mat dad siŋa dirde hiyeŋ gobe den belen neŋ ge gusuŋaŋ irde hikeb gogo wol heŋ faraŋ durde hiyeŋ. Niŋgeb al budam neŋ ge teŋ gusuŋaŋ irde hike Al Kurun belen gusuŋaŋmiŋ wol heŋbe neŋ gayen buniŋeŋ dirde igiŋ igiŋ dirde hiyeŋ goke mel gore Al Kurun igiŋ nurde uneŋ hinayiŋ.

Pol belen Korin mar usi ma yiriŋ goke yiriŋ

¹²Be, neŋbe det unŋkurenŋ kura goke turunŋ yaŋ nurde amaŋ heŋ hityen goyen goke diniŋ tihim. Gobe gahade: neŋ megen heŋyabe mataya metenŋya teŋ hityen gobe bininiŋde matbe fudinde yeŋ nurde hite. Denŋa hinhetŋa wor mataya metenŋya fudinde teŋ teŋ gobe tareŋ wor po tanarde hinhet. Gwaha teŋ hityen gobe nende saŋiŋde moŋ, Al Kurunŋyen tareŋde teŋ hityen. Irde megen niŋ alyen dufay wukkeŋ inen hanjen goyen gama irde mata goyen ma teŋ hityen. Al Kurun belen buniŋeŋ dirde igiŋ igiŋ dirde hiyen go hende huwardeb mata gogo teŋ hityen. ¹³⁻¹⁴Neŋbe mere gahade kaŋ hite gabe den belen igiŋ kapyan heŋ bebak titek mat kaŋ hite. Irde mereniniŋ kurab bikkeŋ bebak tiyan gwahade goyen po, mere kaŋ hite gayen tumŋaŋ keŋkela wor po bebak teŋ hiwoŋ yeŋ nurde goke doyan heŋ hite. Gogab Doyan Al Kurun Yesu waŋ waŋ nalurebe neŋ belen den ge turunŋ yaŋ nurde amaŋ heŋ hitek gwahade po, den wor neŋ ge igiŋ turunŋ yaŋ nurde amaŋ heŋ hinayiŋ.

¹⁵Nebe den belen matane gwahade goyen kenen keŋkela bebak tiyamiŋ yeŋ nurde hinhem geb, den goyen Al Kurun belen sopte guram dirde tareŋ dirwoŋ yeŋ nurdeb den wa kuŋ denenŋ yeŋ nurde hinhem. ¹⁶Nebe

^a 1:8 Esia naŋa gobe gayenter niŋ Esia naŋa kurun goke ma yitiŋ. Gayenterbe Turki inen hanjen.

Masedonia nanjare kuŋ henja den hitte forok yeŋ denen gab kwen yeŋ nurde hinhem. Irde Masedonia nanjare mat mulgaŋ heŋ waŋ henja den hitte kumekeb den beŋ faraŋ nurde beŋ damu teŋ nunkeb igiŋ Yudia nanjare kwen yeŋ nurde hinhem. ¹⁷Goyenbe dufay gwahade kirmiriŋ gobe keŋkela ma dufay heŋ mali kiriŋ yeŋ nurde haŋ? Irde megen niŋ mar beŋ, “Gwaha, ireŋ geb,” yeŋ gab, “Moŋ, go ma ireŋ,” yeŋ hanjen gwahade goyen po, ne manan gwaha teŋ himyen yeŋ nurde haŋ? Moŋ, gwahade moŋ. ¹⁸Fudinde wor po, Al Kurun beŋ biŋa tiyyiŋ goyen go po gama irde hiyen gwahade goyen po, ne wor gwaha gwaha tiyeŋ dinenbe goyen po gama irde himyen. Merene soŋ ma heŋ hiyen. ¹⁹Gobe Al Kurun Urmiŋ Yesu Kristu beŋ “Gwaha gwaha tiyeŋ,” yeŋ gab, “Moŋ, gwaha ma tiyeŋ,” ma yeŋ hinhin geb, gogo ne wor yeŋ teŋ hinhin gwahade po teŋ himyen. Yeŋbe Timoti, Sailasyabe neya beŋ den hitte yeŋ ge tagalde hinhit al gogo. Yesu Kristu gobe Al Kurunyen dufay po gama irde hugiŋ, “Gwaha, ireŋ geb,” yeŋ hiyen. ²⁰Gobe Al Kurun beŋ biŋa teŋ hinhin kurun goyen Yesu Kristu beŋ gama irde igineŋ forok yiriŋ geb gago dinen hime. Gwahade ningeb neŋ beŋ Al Kurunyen mere nurdeb Yesu Kristu niŋ teŋbe, “Fudinde wor po,” inenbe denem turun yaŋ irde hityen. ²¹Al Kurunbe neŋa denja tumnan saŋiŋ dirkeb Yesu Kristuya heŋ tareŋ po hite. Al Kurun beŋ neŋa denja tumnan megen niŋ mar hitte mat dad hoyan muŋ diriŋ. ²²Irde alya bereyamin hitiŋ mar goyen nere yeŋ nurdeb bininiŋde soŋ irde Holi Spirit kiriŋ. Holi Spirit gobe Al Kurun beŋ detmiŋ kura goke biŋa tiyyiŋ kurun goyen kame dunyen gobe fudinde yeŋ nurnayiŋ yeŋbe gogo Holi Spirit kiriŋ.

²³Ningeb Korin taunde ma mulgaŋ himiriŋ gobe kanduk duntek ma nirkeb gogo mulgaŋ ma himiriŋ. Merene gabe fudinde moŋ kenem Al Kurun beŋ mununyeŋ. ²⁴Neŋbe den beŋ Al Kurun niŋ dufaytiŋ tareŋ irde haŋ goyen ingogaha ma dirde hite. Gwaha titenbe Al Kurun niŋ dufaytiŋ saŋiŋ irtiŋ go hende tareŋ po huwarde hanjen geb, den aman heŋ heŋ ge denja tumnan meten teŋ hityen.

2 ¹Ningeb sopte den hitte kuŋ kanduk dunen dunen gobe igiŋ moŋ yeŋ nurdeb go ma kwen yeŋ dufay kirmiriŋ. ²Gobe den hitte kuŋ kanduk dunmeke bitiŋ misiŋ nurnayiŋbe al kura aman hetek mata kura ma niryen yeŋ nurdeb gogo dufay gwahade kirmiriŋ. Gwaha nirtek marbe buluŋ dirmeke bitiŋ misiŋ katnayeŋ mar den gogo po geb. ³Gwahade ningeb den hitte ma kuŋbe asaŋ go wa kaŋ dunmiriŋ.

Dufaynerbe goyenter den hitte kumiriŋ manhan den ge amaneŋ nurtekdebe mata buluŋtiŋ yeneŋ goke kandukneŋ nurmewoŋ yeŋ nurmiriŋ geb, gogo asaŋ po kaŋ dunmiriŋ. Irdeb kame kuŋ matatiŋ hoyan henayiŋ goyen denenbe aman hewen yeŋ nurde himyen. Ne aman hewenbe den wor amaneŋ nurnayiŋ yeŋ nurde himyen. ⁴Fudinde, asaŋ go kamiriŋyabe den ge kandukneŋ wor po nurde bene misiŋ nirkeb

esimirij. Asañ go kamirij gobe bitij buluj yird yird nij ma kamirij. Gwaha dirtinjenbe den ge amanen wor po nurde dunen himyen goyen bebak tiwon yen nurdeb asañ gogo kamirij.

Pol buluj iramij mar gote mata buluj goyen halde yunij

⁵Goyenpoga den han bana goyen al kura kanduk forok yirde hiyen. Go al gobe kanduk forok yirke gore kura ne ma buluj nirde hanjen, dindigen goyen po buluj yirde hanjen. Den tumnan mon goyenbe, al kurabe buluj yirde hanjen. ⁶Ningeb al gote mata goke al budam igij ma nurde merem yan irde gote murungem unan. Den beley gwaha iran gobe ep iran yen nurde hime. ⁷Ningeb gayenterbe al gote mata buluj goyen halde unenbe bin yurum irnayin. Gogab matamin gote murungem ten bin misin wor po katen hi goke kanduknen wor po ma nuryen. ⁸Ningeb den beley yen ge fudinde wor po amanen nurd unen han gobe gwaha mat ikala irwon yen nurde gusunan dirde hime. ⁹Ne beley han kapya asan kan dunmirij gobe saba dirmirij kurun goyen kenkela gama irde han ma dahade goyen bebak timewon yen nurdeb gogo asan kamirij. ¹⁰Ningeb den beley merene gama irde al kurate mata buluj halde unnayinbe ne wor halde unen. Fudinde, ne beley al kurate mata buluj halde yunen himyen gobe den ge ten Yesu Kristu dilinde halde yunen himyen. Al kurate mata buluj halde yuntek han kenem gwahade po dufay henya halde yunen himyen. ¹¹Gogab Satan beley nen gayen epte ma usi dirde buluj diryen. Nenbe Satan gote dufaybe dahade goyen nurde hityen geb, gago dinen hime.

Yesu Kristu denjembe kurun hen hinhin

¹²Be, ne beley Yesu Kristu nin yitin mere igij goyen tagalen yenbe Troas taunde kumirij. Kun gorbe meten ten ten belnen biknen Doyan Al Kurun beley gitik irde nuntin goyen kinmirij. ¹³Gega kadne Taitusbe gor ma hinhin geb, goke bener kanduknen nurde hinhem. Ningeb gor nin mar yubul tenbe Masedonia nanare kumirij.

¹⁴Goyenpoga Al Kurun beley asogom haninde mat dawarke Yesu Kristuya hen asogomde meten goyen huginen fole irde hite geb, goke Al Kurun igij nurde unen himyen. Yen beley hulyan dirke Yesu nurd unen yenya awalikde hen hen gobe det hamnen igij mun yara goyen tagalde tukun hiteke al budam wor po nurtin ala ten hanjen. ¹⁵Det hamnen igij mun wor po Al Kurun galak irde hanjen gwahade goyen po, Yesu Kristu beley metenmin ten ten ge ten nen gayen dade Al Kurun galak irtin geb, alya bereya Al Kurun beley yumulgan titin marya yubul tike kak alare kutek han marya goyen tumnan mereninin nurde hanjen. ¹⁶Hamin gobe Al Kurun beley yubul tike kak alare kutek han mar hittebe bidak hamin. Munan Al Kurunya huginen hitek han mar hittebe hamin igij mun Al

Kuruŋ hitte yumulgaŋ teŋ teŋ goyen. Metenŋ gobe tonŋenŋ yaŋ wor po geb, ganuŋ al belenŋ epte metenŋ goyen titek hi? Hubu wor po! ¹⁷Goyenpoga neŋbe al budam wor po hora niŋ po nurdeb Al Kuruŋyen mere goyen det titmiŋenŋ kura yeŋ nurde hanŋenŋ gwahade ma teŋ hityen. Gwaha titŋenŋbe Al Kuruŋ belenŋ hulyaŋ yirke metenŋ teŋ haŋ mar gwahade goyen po, Yesu Kristuya heŋ bininiŋde mat fudinde wor po Al Kuruŋ belenŋ denenŋ hikeya mere tagalde kuŋ hityen.

3 ¹Be, gwaha yeŋ hitekeb denŋ belenŋ nurdembe yinŋenŋ ge turuŋ turuŋ teŋ haŋ yeŋ nurde haŋ? Gwahade ma nurde haŋ kenem al kura belenŋ teŋ hanŋenŋ gwahade goyen po, denŋ belenŋ neŋ gake hekkenŋ nurwoŋ yeŋ al hoyanŋ belenŋ kura neŋ ge asaŋ kura kaŋ denŋ goyen dunwoŋ yeŋ gusuŋaŋ irtek hite yeŋ nurde haŋ? Ma asaŋ goyen denŋ belenŋ neŋ niŋ kaŋ dunwoŋ yeŋ gusuŋaŋ dirtek hite yeŋ nurde haŋ? Moŋ, gwahade moŋ! ²Gwaha titŋenŋbe al budam wor po matatiŋ yenenŋ sabaniniŋbe fudinde yeŋ neŋ ge hekkenŋ nurtek po haŋ geb, asaŋ kura neŋ gayen gake al hoyanŋ belenŋ kapyanŋ heŋ hekkenŋ nurtek yeŋ bininiŋde katiŋ asaŋ gobe denŋ gogo yeŋ nurde hite. ³Fudinde, Yesu Kristu niŋ teŋ neŋ belenŋ metenŋ teŋ hinhet gote iginenŋbe denŋ gogo. Niŋgeb denŋbe Yesu Kristu belenŋ asaŋ kaŋ neŋ hitte teŋ kerke watiŋ go gwahade goyen. Asaŋ gobe al belenŋ kaŋ kaŋde niŋ kutum teŋ katiŋ yara moŋ, Yesu Kristu belenŋ Al Kuruŋ gwahader hiyen gote Holi Spirityen tareŋde katiŋ go goyen. Asaŋ gobe hora parwek hende ma katiŋ, al biŋde katiŋ.

⁴Neŋbe Yesu Kristu belenŋ faraŋ durke Al Kuruŋ diliŋde denŋbe neŋ ge teŋ katiŋ asaŋ yeŋ nurde dufayniniŋ hek irde hite. ⁵Fudinde, neŋbe Al Kuruŋyen metenŋ teŋ teŋ saŋiŋbe neŋ hitte mat ma forok yeŋ hi geb nindigenŋde tareŋde metenŋ goyen titek yetek moŋ. Metenŋ go teŋ teŋ tareŋ gobe Al Kuruŋ hitte mat po waŋ hi. ⁶Yeŋ po ga biŋa gergenŋ tiyyiŋ goyen neŋ belenŋ igiŋ goke metenŋ teŋ hitek saŋiŋ duntiŋ. Tarenŋmiŋ gobe Moseyen saba asaŋde katiŋde mat ma watiŋ, Holi Spirit hitte mat watiŋ. Moseyen sabarebe al belenŋ mata buluŋ kura tiyyenŋ gobe Al Kuruŋ diliŋde kamtiŋ yitiŋ gega, al kura mata go tubul tiyyenŋbe Holi Spirit belenŋ Al Kuruŋ diliŋde al gergenŋ iryenŋ geb, gago metenŋ goyen teŋ teŋ tareŋbe Holi Spirit hitte mat watiŋ dinenŋ hime.

Al Kuruŋ belenŋ biŋa gergenŋ tiyyiŋ gobe turuŋ yaŋ wor po

⁷Be, Al Kuruŋ belenŋ sabamiŋ hora parwek hende kaŋ Israel mar saba yird yird metenŋ Mose unyiŋ goyenterbe Al Kuruŋyen tareŋ turuŋ yaŋ goyen forok yiriŋ. Irkeb Mose kimiŋde melak hiriŋ. Al Kuruŋyen saŋiŋ turuŋ yaŋ Mose kimiŋde melak heŋ forok yiriŋ gobe heŋ ga ma hubu hetek det gega, Israel mar diliŋdeb tareŋ wor po geb, kenenŋ kenenŋmiŋ metenenŋ wor po yirde hinhin. Moseyen sababe epte ma al kura Al Kuruŋ diliŋde al gergenŋ irtek gega, Al Kuruŋyen tareŋ turuŋ yaŋ go miŋyaŋ

hinhin. ⁸Ningeb Moseyen saba gote folek Holi Spirityen meten gote sanjij turunjan yanbe dahade hiyyen yen nurde han? Kurun wor po, Moseyen saba gote folek wor po! ⁹Moseyen saba gote metenbe al merem yan yird yird gega, tarehmin turunjan yan. Ningeb Holi Spirityen meten al huwak yird yird gote tarehmin turunjan yanbe Moseyen saba gote folek wor po! ¹⁰Fudinde, sanjijmin turunjan yan bikkek gobe tareh hoyan turunjan yan gergen gore fole irtij geb, tareh turunjan yan bikkek gobe gayenterbe hubu hiyun. ¹¹Moseyen saba gobe mun kura hen ga hubu hetek hinhin gega, Al Kurunyen sanjij turunjan yan hirij. Ningeb Holi Spirityen meten hugij hitek gote tareh turunjan yanbe Moseyen saba gote folek wor po!

¹²Ningeb nenbe Al Kurunyen tareh turunjan yan goyen goke doyan hen hite geb, al beleh bulun dird dird nij kafura ma hen meremin kawan po tagalde hityen. ¹³Mosebe Al Kurunyen sanjij turunjan yan goyen agat urde kiminde forok yirij goyen aymuk irde hubu hen hinhin goyen wor Israel mar beleh daha kennak yenbe amil ten kimin aw uryin. Gega nenbe Mose beleh kimin aw uryin gwahade ma ten kawan po Al Kurunyen mere tagalde hityen. ¹⁴Goyenpoga Israel mar gobe dufaymin pet titij hinhan gwahade goyen po, gayenter wor Moseyen kiminde amil aw urtij go gwahade yara dufaymin pet titij goyen Yesu Kristuya hikeb Al Kurun beleh ten sina irwon gega, yenya ma han geb, dufaymin pet titinde po han. Ningeb bina bikkek Al Kurun beleh tiyyin goyen asande katin gobe kapyan hen han gega, bebak ma ten han. ¹⁵Fudinde wor po, gayenter wor Israel mar gobe amil gore dufaymin pet titinde po henya Moseyen saba kapyan hen han geb, Al Kurunyen tareh turunjan yan goyen go ma kenen han. ¹⁶Goyenpoga al kura Doyan Al Kurun hitte mulgan hen kuyenbe bin pet titij amil goyen Doyan Al Kurun beleh ten sina iryen. ¹⁷Be, “Doyan Al Kurun” yen hime gobe Holi Spirit nij yen hime. Doyan Al Kurun Yesu Kristuyen Holi Spiritbe mata bulunde mat al yad sina yirkeb mata bulun yufukde ma hinayin. ¹⁸Ningeb binininde amil po pet titij yara goyen ten sina irde Doyan Al Kurunyen tareh turunjan yan goyen nen hitte kawan irde hite. Irkeb sanjijmin turunjan yan nen hitte hen kurun hen hiyen gore tareh dirkeb mataniniya dufayniniyabe Al Kurunyen yara hen hinayin. Tareh turunjan yan gobe Doyan Al Kurun hitte mat watin. Doyan Al Kurun gobe Holi Spirit.

**Nenbe Al Kurunyen meten titek mar mon gega,
bunijen dirke metenmin ten hityen**

4 ¹Ningeb nenbe Al Kurun beleh bunijen dirde Holi Spirityen meten gayen duntij geb, meten ga ten ten ge pinen ma hen hityen. ²Irde mata memyak kura banare po ten hityen kurun goyen yubul po titirin. Irde al usi ma yirdeb Al Kurunyen mere bulun ma irde hityen. Gwahade yarabe mere fudinde goyen kenkela po kawan tagalde hityen. Irkeb

al tumŋaŋ Al Kurun dilingde mata huwak ten hityen goyen denenbe binde mat fudinde wor po nenbe al dahade goyen bebak ten hanjen.

³Goyenpoga Yesu nin yitin mere igin nen belen tagalde hityen goyen al kura bebak ma ten han kenem mel gobe kak alare kutek mar geb, gogo mere igin gote min bebak ma ten han. ⁴Yenbe gayenter ungura megen han gore bin pet titin geb, Yesu Kristuyen taren turun yan goke yitin mere igin gote iginen igin wor po huli yara goyen kenen bebak ma ten han. Yesu Kristu belen Al Kurunbe al gwahade yen kawan irde hi. ⁵Fudinde, nenbe nindiken ge ma tagalde hityen. Yesu Kristube Doyan Al Kurun, irde nenbe Yesu Kristu nin tenbe dende meten mar hitin goyen goke tagalde hityen. ⁶Go ten hityen gobe, “Kidoma bana mat huli forok yiwi,” yirin al Al Kurun belen bininin bana meremin bebak ten ten sanin huli yara goyen kirin geb, gogo gwaha ten hityen. Yen belen bininin bana meremin bebak ten ten taren kirin gobe Al Kurunyen taren turun yan Yesu Kristu hitte mat forok yen hien goyen kenen bebak tinayin yenbe gogo kirin.

⁷Be, nenbe sanininin ga mon geb, Al Kurunyen taren turun yan kenen bebak ten ten taren goyen bininin bana kerte epte mon gega, sanin goyen nen bana kirin. Gobe Al Kurunyen taren kurun wor po gobe nende mon, Al Kurun hitte mat watin goyen al yikala yird yird nin gogo kirin. ⁸Ningeb nenbe kanduk kurayen kurayen kurhan mat mat hikaka dirde hanjen gega, yul ma yen hityen. Kurarebe dumetek dirte dirde hanjen gega, mukku ma ten hityen. ⁹Al belen bulun bulun dirde hanjen gega, Al Kurunbe dubul ma ten hien. Kurab mudunen hanjen gega, go ma kamde hityen. ¹⁰Nenbe Yesu ulin misin kurun katen kamin gwahade goyen po, nen ulininde wor huginen kanduk yenen henya kun hityen. Gogab Yesu kaminde mat huwarin taren gobe nen hitte wor forok yiye. ¹¹Fudinde, nenbe dlininin gergen hite gega, Yesu nin ten meten ten kun hitekeb al belen huginen mudunke kamte belen po hityen. Gogab yen kaminde mat huwarin sanin gobe nen ulinin belen hi gayenter wor kawan forok yiye. ¹²Ningeb nenbe Yesu nin ten meten ten kanduk yenen kamte po hityen. Gega kanduk yenen henya meten ten hityen gote iginenbe den gogo Al Kurunya huginen hen hen bana han.

¹³Be, Al Kurunyen asanbe gahade katin hi:

“Al Kurun nin dufayne taren irmin.

Ningeb yen ge tagalde himyen,” yitin.

Tikin 116:10

Ningeb yitin gwahade po, nen wor yen ge dufayninin taren irtirin geb, yen ge tagalde hityen. ¹⁴Nenbe Doyan Al Kurun Yesu kaminde mat isan hiri al gore nen wor Yesu isan hiri gwahade po disan hiye, irde denya nenya tumŋaŋ dukukeb nenya hitek yen nurde hityen geb, yen ge tagalde hityen. ¹⁵Mata gwahade kurun gobe den ge ten forok

yeŋ hanŋen. Gogab Al Kurun belen al buninen yirde igin igin yird yird gobe kurun heŋ hike al budam wor po goke Al Kurun igin nurde unenbe deŋem turun yaŋ wor po irnayin.

¹⁶Ningeb kanduk yenenbe Al Kurunyen meten ten ten ge mukku ma ten hityen. Fudinde, ulnininbe alik heŋ sanin minmon heŋ hite. Gega dufaynininbe huginen gise hanŋa gergen heŋ hite. ¹⁷Nenbe gayenter kanduk muknen belnen ge yenen hitere gor mat taren henbe Al Kurunyen taren turun yaŋ gwahader hiyen go bana hitek yenbe gogo dufaynininbe huginen gergen po heŋ hite. Al Kurunyen sanin turun yaŋ gobe igin wor po, kanduk kurayen kurayen kurun gote folek wor po. ¹⁸Ningeb nenbe megen nin det kawan yentek goyen yad yad nin ma nurde hityen. Det kura Al Kurunyen gasunde nin goyen yad yad nin po nurde hityen. Gobe megen nin det kawan yentek gobe huginen ma hinayin gega, Al Kurunyen gasunde nin det gobe gwahader hinayin geb, goyen yad yad nin po nurde hityen.

5 ¹Be, ga dinen hime gabe megen henya ulninin ya yara gayen kamtekeb bida henayin geb, gago dinen hime. Nende ya wor po gwahader hinayin gobe Al Kurun belen gasunminde yirde dunyen yen nurde hite. Ya gobe al haninde ma yirnayin, Al Kurun belen po yiryen. ²Ningeb megen gar ulninin gaya heŋ kanduk yenen henyabe kame Al Kurunyen gasunde nin ulninin gergen goya heŋ heŋ nin doyan heŋ hityen. ³Doyan heŋ hityen gobe kame kamteke Al Kurun belen ulninin gergen ulin umna yara hor yirde dunke tonnininbe kupson ma hiyyen geb, gogo doyan heŋ hityen. ⁴Fudinde, kamde ulninin ga yubul titewon yen ma nurde hite. Gwahade yarabe ulninin gergen Al Kurun belen yirde dunyen goyen hor yirde dunwon yen nurde hite. Gogab ulninin megen nin kame bida hetek gayenbe Al Kurunyen gasunde nin ulninin gergen gore gasunen tiyyen. Ningeb goyen goke po dufay heŋ doyan henya daha nana gab forok yewen tiya yen kanduknen nurdeb nuran ten hityen. ⁵Be, Al Kurunbe mata gwahade forok yen yen ge nen gayen diryin. Irde mata goyen kame forok yiyyen gobe nen belen fudinde yen nurnayin yenbe gogo Holi Spirit dunyin.

⁶Ningeb goke tenbe huginen taren po heŋ hityen. Irde megen gar ulninin gaya henya Doyan Al Kurunya awalik heŋ heŋ gobe ulninin gergen dunyen goya heŋ yenya bindere wor po hitek gwahade mon, gisaw yarham hite yen nurde hityen. ⁷Gega ga kun hite gabe Doyan Al Kurunbe dilnininde kenenya ma kun hite. Kawan ma kenen hite gega, dufayninin po yen ge taren irdeya kun hite. ⁸Fudinde, nenbe dufay go hende sanin heŋ hityen. Irdeb ulninin ga yubul ten Doyan Al Kurun hitte hurkun yenya hitewon yen nurde hityen. ⁹Ningeb ulninin gaya hite gayenter ma, yubul ten Doyan Al Kurun hitte hurkutek daw goyenbe yen belen amanen nurtek mata po ten hitewon yen nurde hityen. ¹⁰Gobe

kame Yesu Kristu belen al iginya bulunya pota yirde gote murungem yunyen goyenterbe nen tumnan yen diliŋ mar huwartek geb, gogo yen amanen nurtek mata po ten ten ge dufay hen hityen. Be, nen merere huwardeb megen gar ulniniŋ gaya henya mata ten hitiŋ kurun gote murungem yawartek. Yen belen gab mataniniŋ iginya bulunya gote murungem dunyen.

Al Kurunya awalik hen hen

¹¹ Ningeb Doyan Al Kurun palap irde kafura ird ird matabe dahade goyen kenkela nurde hityen geb, al hoyan wor nurde gama irnayin yen mere yird yird nin kurut yen hityen. Nen belen meten go ten hityen gobe Al Kurun belen nenbe al gwahade yen kenkela nurd dunen hikeya meten go ten hityen. Ningeb den wor bitiŋ bana mat kenkela nurd dunen hiwon yen nurde hite. ¹² Be, ga diniŋ hite gabe nen gayen turun dirnan yen kurut yen hite? Mon, gwahade mon. Gwaha titnenbe den ge meten ten hinhet goke dindiken ge turun yan nurde aman hen hinayin yenbe gago diniŋ hite. Gogab al kura al denem yan hen hen ge po nurdeb mata igin al binde mat forok yen hanjen goke ma nurde hanjen mar gote mere goyen den belen igin wol henayin. ¹³ Nenbe gwahade geb, nindiken ge ma nurde hityen. Ningeb al kura belen nen gayen kukuwa nenbe mata gogo ten han yen denen hinayin gobe Al Kurun nin po tenbe gogo ten hitek. Irde kenkela dufay hen mata ten han yen denen hinayin go wor den ge tenbe gogo ten hitek. ¹⁴ Gobe Yesu Kristu belen nen gayen bubulkuŋne wor po yen nurd duntiŋ gore bininiŋde mat wor po yen ge meten ten hitek po dirde hi geb, gogo gwaha ten hitek. Irde det unkuŋen kura bebak titinyen hite gobe gahade: al unkuŋen Yesu Kristu belen al megen nin kurun gate mata bulunmin ge ten kamyin geb, go mar goyen wor tumnan kamtiŋ yara hen mata bulun gote yufuk bana ma han. ¹⁵ Yesu Kristu kamyin gobe albe yingen ge po ma nurdeb yen ge ten kamde sopte huwaryin al Yesu Kristu goke po hinayin yenbe gogo kamyin.

¹⁶ Ningeb nenbe megen nin alyen dufay hende huwarde al hoyande mata goyen yenen igin ma bulun tahan ma yen hityen. Nen wor bikkenbe son hen megen nin alyen dufay hende huwarde Yesu Kristube al gwahade yen ma nurdeb bulun mat nurd untiriŋ. Gega gayenterbe gwaha ma ten hityen. Hubu wor po. ¹⁷ Ningeb al kura Yesu Kristuya hiyen al gobe Al Kurun diliŋde al gergen wor po hiyyen. Fudinde, det bikkekbe hubu heke det gergen igin goyen po forok yenayin ¹⁸ Det gergen kurun gote min albe Al Kurun. Yen belen Yesu Kristu ten kerke wanbe nen ge ten kamyin. Al Kurunbe gwaha mat nenya awalik hitiriŋ. Irdeb al hoyan wor yenya awalik hen hinayin yen meten dunyiŋ. ¹⁹ Fudinde, alya bereya megen han gore Yesu Kristuya hikeb Al Kurun belen awalik yirde mel gote mata bulun goke ma nurde hiyen. Irde yenya mel goya awalik hen hen mata

goke tagalde tukun tukun meten goyen nen gayen dunyinj. ²⁰Ningeb nenbe Yesu Kristu nin tenbe meremij basan hen tagalde hite. Irde Al Kurun belen den ge nurde mere dirtinj goyen momon dirde hinhet. Ningeb Al Kurunya awalikde hinayinj yen Yesu Kristu nin tenbe gago esen mere dirde hite. ²¹Al Kurunbe nen gayen Yesu Kristuya hen yingenje alya bereya huwak henayinj yenbe Yesu Kristu mata bulun minmon goyen nen ge ten mata bulun minyan al yara iryinj.

6 ¹Irde Al Kurun belen buninen dirde iginj iginj dirde hiyen goyen det titminen kura yen ma nurde hinayinj. Nenbe Al Kurunyen meten mar kadtin geb, gago mere taren po dirde hite. ²Goke tenbe Al Kurun belen asanminde gahade yirin:

“Den iginj dirtek nalu hekeb gusanantinj nurmirinj.

Irde dumulgan ten ten nalu hekeb faran durmirinj,” yitinj. *Aisaia 49:8* Ningeb gayenter gayenbe Al Kurun belen iginj dirtek nalu, irde dumulgan ten ten nalu geb, Al Kurun belen buninen dirde iginj iginj dirde hi goyen det titminen kura yen ma nurde hinayinj.

Polbe kanduk kurayen kurayen bana hinhin

³Be, nenbe al kura Al Kurun gama irnin yekeb beleminj pet pet ma ten hityen. Gogab al kura belen metenminj ge ulninde merem yan ma dirnayinj. ⁴Gwaha titnenbe mata ten hityen goreb nen gayen Al Kurunyen meten mar yen kawan irde han. Mata ten hityen gobe gahade: kanduk yenen mukku ma ten goya goya taren po hen hityen. Nenbe kanduk karkuwan kurayen kurayen bana hityen. ⁵Kurareb mudunen hinhan, koyare derde hinhan. Irde kurareb al gabu irde bulun bulun dirde hinhan. Be, kurarebe meten sanj po ten wawun ma ferde hinhet. Irde binje kamde hinhet. ⁶Nenbe Al Kurun dilinde mata wukkek po ten hityen, Al Kurun kenkela nurd unen yenya awalikde hityen, al kura matamin iginj hewon yen doyan hen hen ge pinen ma hen hityen, al hoyan iginj iginj yirde hityen. Irde Holi Spiritya hen binininde mat fudinde wor po al hoyan nin amanen nurd yunen hityen. ⁷Irde mere fudinde po tagalde hityen, irde Al Kurunyen tarenje meten ten hityen. Irde asogonininj unguraya fuleja ten ten ge fulejare nin bidila yara mata huwak goyen taren po yanarde hityen. Hannininj yase belen po mon, tapa belen manan yanarde hityen. ⁸Be, al kurabe denminj turun yan dirde, kurabe ulninde merem yan dirde hanjen. Irde al kurabe nen ge bulun mat tagalde hanjen, kurabe iginj mat tagalde hanjen. Be, al kura belen nenbe usi mar dinen hanjen gega, nenbe mere fudinde po ten hityen. ⁹Nenbe al kura ma nurd duntinj yara hityen gega, al budam nurd dunen hanjen. Irde kamtek wor po hityen gega, gago dilnininj gergen hite. Irde mudunen bulun dirde hanjen gega, kamde ma hityen. ¹⁰Nenbe nindigen ge buninen nurde hitek yara gega, huginen aman hen hityen. Irde nenbe

al siksukneŋ denen hanŋen gega, al budam faran yurteke igin heŋ hanŋen. Neŋbe megen niŋ detniniŋ miŋmon hityen gega, Al Kurunŋyen gasunŋe niŋ detbe epte wor po hityen.

¹¹ Be, denŋ Korin taunde niŋ mar, denŋ mere dirde heŋyabe mere kura bana ma yerde hityen. Bininiŋdebe denŋ ge po nurde hityen. ¹² Denŋ ge amanenŋ nurd nurd mata gobe bada ma heŋ hityen. Goyenpoga denŋ beleŋ neŋ ge amanenŋ nurd nurd mata goyen bada heŋ haŋ. ¹³ Niŋgeb bininiŋde denŋ ge nurde hite gwahade goyen po, denŋ wor bitiŋde mat wor po neŋ ge nurde hinayiŋ. Mere gabe igin bebak tinayiŋ yeŋ al kura urmiŋ bebak titek mat saba iryenŋ go gwahade goyen mere dirde hime.

Neŋbe Al Kurunŋyen ya balem

¹⁴ Be, denŋbe Al Kurunŋ niŋ dufaymiŋ saŋiŋ ma irtiŋ marya gabu ma heŋ hinayiŋ. Gobe mata huwaky a mata bulunŋyabe hoyan hoyan wor po, irde hulsiya kidomaya wor epte ma gabu hiriryenŋ. ¹⁵ Irde Yesu Kristuya Satanyabe epte ma awalikde hiriryenŋ. Irde Yesu niŋ dufaymiŋ tareŋ irtiŋ marya al gwaha ma teŋ haŋ maryabe hoyan hoyan wor po. ¹⁶ Irde Al Kurunŋyen ya balem ya unŋgura doloŋ yird yird ya goya wor hoyan hoyan wor po geb, gago dineŋ hime. Fudinde, neŋbe Al Kurunŋ gwahader hitiŋ gote ya balem wor po. Goke teŋbe Al Kurunŋ beleŋ asaŋmiŋde gaha yiriŋ: “Nebe mel goya heŋ yeŋya kuŋ heŋ.

Irde yende Al Kurunŋ hemekeb yeŋbe nere alya bereya henayiŋ.”

Liwai 26:11-12; Yeremaia 32:38; Esekiel 37:27

¹⁷ Niŋgeb Doyan Al Kurunŋ beleŋ,

“Denŋbe mata bulunŋ mar goyen bana mat siŋare kateŋ hoyan hinayiŋ.

Det kura delner bulunŋ gobe go ma tanarde hinayiŋ.

Merene gayen gama irde hinayiŋbe dawarenŋ.

Aisaia 52:11; Esekiel 20:34,41; Yuwarwar 18:4

¹⁸ “Irdeb nebe Nanatiŋ hemekeb denŋbe urne wenŋya werne wenŋya henayiŋ.

Mere gabe Doyan Al Kurunŋ tareŋmiŋ kurunŋ wor po gore tiyyiŋ,” yitiŋ hi.

2 Samuel 7:14; 7:8; Yeremaia 31:9

7 ¹ Be, kadne yago, Al Kurunŋ beleŋ biŋa gwahade neŋ hitte tiyyiŋ geb, ulniniŋya tonniniŋya bulunŋ yirtek det kurunŋ goya tumŋan ma heŋbe mataniniŋbe wukkek po yirde hitek. Irde Al Kurunŋ palap ird ird mata teŋ Al Kurunŋ diliŋde wukkek heŋ heŋniniŋ kurunŋ gobe upsineŋ wor po irtek.

Polbe Korin niŋ mar Yesu niŋ biŋ mulgan hamiŋ goke amanŋ hiriŋ

² Be, denŋbe bitiŋde neŋ ge nurde hinayiŋ. Neŋbe al kura bulunŋ ma yirde hityen, irde al kurate dufay bulunŋ ma yirde hityen. Irde almet det komkom

ma heŋ hityen. ³Ga dinen hime gabe den beŋ mata buluŋ tike goke ma dinen hime. Neŋbe bininiŋde mat den ge amaneŋ nurd duneŋ hityen geb, diltiŋ gergen hinayiŋ ma kamnayiŋ kura goyenbe neŋ manan gwaha po titek yeŋ nurde hityen goyen bikkeŋ momoŋ dirmiriŋ. ⁴Nebe den ge hekkeŋ wor po nurde himyen. Irde dende matatiŋ goke nigen ge turuŋ turuŋ wor po teŋ himyen. Den mata igiŋ teŋ hanŋen gore saŋiŋ wor po nirde hiyen. Irde kanduk kurayen kurayen bana himyen gega, amaneŋ wor po nurde himyen.

⁵Fudinde, neŋbe Masedonia naŋa bana goŋ forok yeŋbe kanduk bana po hinhet geb, ulniniŋde kura muŋ falmukneŋ ma hinhet. Goŋ hinhetyabe kanduk kurayen kurayen kurhan mat mat forok yeŋ hinhan. Irkeb asogo dirde hanŋ marya kadamde teŋ hinhet, irde bininiŋdebe kafura heŋ hinhet. ⁶Goyenpoga kandukneŋ nurde hanŋ mar biŋ yurum yird yird al Al Kuruŋ beŋ Taitus goyen neŋ hitte waŋ waŋ beŋ kerd unkeb wake keneŋbe bininiŋ yurum hiriŋ. ⁷Goyenbe yeŋ wayyiŋ goke po ma aman hitiriŋ. Den beŋ Taitus goyen biŋ yurum iramiŋ goke wor amaneŋ nurtiriŋ. Den beŋ ne nentek wor po dirde hi, irde kanduk bana hime gake ne niŋ buniŋen nurdeb uguŋ po dufay heŋ hanŋ goyen momoŋ niryiŋ. Irkeb goke manan amaneŋ wor po nurmiriŋ.

⁸Be, hanŋkapy aŋa kaŋ dunmiriŋ goyen kapyan heŋbe bitiŋde misiŋ nuramiŋ goke buniŋen nurde hinhem. Gega misiŋ nurde hinhan gobe ulyanŋde ma kuyeŋ yeŋ nurdeb gayenterbe goke kandukneŋ ma nurde hime. ⁹Gayenterbe aŋa gwahade kaŋ dunmiriŋ goke amaneŋ nurde hime. Gobe bitiŋ misiŋ kateŋ kateŋ mata dirmiriŋ goke moŋ. Den beŋ aŋa go kapyan heŋbe bitiŋ misiŋ nurdeb mata buluŋtiŋ yubul teŋ Al Kuruŋ niŋ bitiŋ mulgaŋ hamiŋ geb, goke amaneŋ nurde hime. Denbe kandukneŋ nuramiŋ gobe Al Kuruŋ wor den beŋ gwahade nurwoŋ yeŋ nurde hinhin geb, Al Kuruŋ diliŋde neŋ beŋ bitiŋ misiŋ kateŋ kateŋ mata dirtiriŋ yeŋ ma nurde hime.

¹⁰Be, al kura biŋ misiŋ nurdeb mata buluŋmiŋ yubul teŋ Al Kuruŋ niŋ biŋ mulgaŋ henayiŋ gobe Al Kuruŋ beŋ dufay go kerd yunkeb gogo tinayiŋ geb, Al Kuruŋ beŋ yumulgaŋ tiyyeŋ. Irkeb biŋ misiŋ nurnayiŋ goke buluŋen ma nurnayiŋ. Munan biŋ misiŋ nurnayiŋ goyen megen niŋ dufayde mat watiŋ kenem biŋ misiŋ gore kamde kamde mata forok yirkeb kamnayiŋ. ¹¹Niŋgeb bitiŋ misiŋ goyen Al Kuruŋ beŋ forok irke nuramiŋde mat da mata igiŋ den hitte forok yeŋ hinhan goyen goke dufay henan ko. Matatiŋbe gahade: Al Kuruŋyen mere gama irtek po nurde hinhan, matatiŋ huwa ird ird niŋ po kurut yeŋ hinhan, mata buluŋ goke igiŋ ma po nurde hinhan, Al Kuruŋ palap irde kafura wor po irde hinhan, irde ne nentek wor po nurde hinhan, al hoyan niŋ wor po nurde hinhan, irde mata buluŋ teŋ hanŋ mar huwa yird yird niŋ wor po nurde hinhan. Mata kuruŋ gayen teŋ heŋyabe dindigeŋ goyen muŋ kura soŋ ma hitiŋ hanŋ gobe al beŋ denenŋ bebak teŋ hinhan.

¹²Ningeb asañ kan dunmirin gobe dindigen ulin al kura kadam bulun yirtin mar goke ten asañ gogo ma kamirin. Irde bulun yirke bin misin nuramin mar goke manan ma kamirin. Gwaha titnejenbe nen beleñ Al Kurun dilin mar den ge dufay kurun wor po hen hityen goyen dikala dirmewon yen nurdeb asañ gogo kamirin. ¹³Ningeb matatin kurun goke ten nenbe tareñ hen hityen.

Goyenbe go po mon. Taitusbe den beleñ tumnan faran urke tareñ hiriñ geb, amanen wor po nurde hinhin goyen kenenbe nen wor aman wor po hitirin. ¹⁴Nebe yen hitte den ge turun turun timirin. Be, yen goyen den hitte kukeb igin igin po iramin geb, goke kura memya hetek ma hinhem. Nenbe huginen mere fudinde po dirde hinhet. Ningeb goyen po gama irde den ge Taitus hitte turun turun titirin gobe yingen kunbe fudinde kinyin. ¹⁵Yenbe den beleñ merene gama irde yen palap irde kafura irde gargar irde hinhan goyen goke dufay henbe hi kurun gabe den ge huginen amanen wor po nurde hi. ¹⁶Ningeb nebe igin den ge heken wor po nurtek hime goke amanen nurde hime.

Al faran yurd yurd mata

8 ¹Be, kadne yago, nenbe Al Kurun beleñ Yesuyen alya bereya Masedonia nana bana han goyen buninen yirde igin igin yirtin goyen den nurwon yen nurde momon dirnin tihit. ²Mel gobe kanduk kurun wor po bana hinhan, irde det minmon wor po gega, al hoyan gwahade hinhan mar goyen kenkela wor po faran yurde hinhan. ³Fudinde, mel gobe det yuntek kura hikeb tumin yunen hinhan. Goyenbe go mun po mon. Epte ma faran yurtek goyen wor daha mat kura faran yurnin yen kurut wor po yen hinhan. Ga dinen hime gabe fudinde dinen hime. Mel gobe dufayminde wilaknen nurdeb ⁴Al Kurunyen alya bereya det nin amu hen han mar faran yurd yurd goke ug po gusunan diramin. Al faran yurd yurd mata gobe Al Kurun dilinde mata igin wor po yen nurdeb nen beleñ ok yinen yinen ge gusunan diramin. ⁵Irkeb dufayninindebe mel goyen al hoyan faran yurnin yen hora daw yunnayin yen ok yintirin. Gega mel gobe nen nurde hinhet goyen fole irdeb igin wor po tiyamin. Mehenbe wor pobe, “Nenbe Al Kurunyen,” yenbe yingen wa Al Kurun unamin. Irde gab Al Kurunyen dufay gama irdeb, “Nenbe Yesuyen mere basan marte yufukde hitek,” yamin. ⁶Goke ten nenbe Taitus beleñ den hitte kun al faran yurd yurd nin hora gabu ird ird meten bikken min uryin goyen denya hen pasi irnayin inenbe hulyan irtirin. ⁷Den mata ten hanjen kurun gobe igin wor po. Al Kurun nin heken nurd nurdya meremin tagal tagalya dufaymin bebak ten tenya goyen igin wor po ten hanjen. Irde metenmin kenkela po titek dufaytin manan kurun wor po. Irde nen ge amanen nurd nurd manan kurun wor po yen denen hityen. Denbe gwahade geb, det kurun amu hen han mar faran yurd yurd mata goyen manan kenkela wor po ten hinayin.

⁸Ga dinen hime gabe gwaha tinan yenj ma dinen hime. Gwahade yarabe al hoyan mata iginj ten han goyen bebak dirmeke nurde gama irnaying ma wasak tinaying goyen nurenj yenbe gago momonj dirde hime. Gogab den belej fudinde al hoyan nin amanen nurde han ma dahade goyen bebak tiyen. ⁹Ga dinen hime gabe Doyan Al Kuruninin Yesu Kristu belej buninenj dirde iginj iginj dirde hiyen goyen denbe nurde han geb, gago dinen hime. Yenbe det kurun gate minj al gega, den ge ten detminj kurun goyen yubul ten al siksuknenj yara hirinj. Gogab Al Kurun dilinde det kurun gote minj mar henaying.

¹⁰Ningeb al hoyan faran yurd yurd mata goyen daha mat tinayinbe iginj yenj goke momonj diren tihim. Be, dama kun imoyenterbe den wa al faran yurd yurd nin nuraminj. Irde den wa al faran yurd yurd meten goyen minj uraminj. ¹¹Ningeb gayenter faran yurd yurd meten gobe pasi irnaying. Hanjapya al faran yurd yurd meten nin wilaknenj nuraminj gwahade po meten goyen pasi irnaying. Dettin dahade kura hike yenenbe go po yade gore faran yurnaying. ¹²Gwaha tinaying dinen hime gobe samuntin dahade han goyen wilaknenj nurdeb al faran yurnayingbe Al Kurun belej goke amanen nuryen geb, gago dinen hime. Samuntin budam kenem budam yunaying, munan budam monj kenem gwahade po al faran yurnayingbe irawakde Al Kurun belej goke amanen nuryen.

¹³⁻¹⁴Goyenbe nenbe al hoyande kanduk yade supahaktinde yertek yenj ma dinen hime. Gwaha titnenbe gayenter samuntin budam han goyen yadeb al hoyan det ninj amu hen han mar goyen faran yurnaying gobe iginj yenj nurde hite. Gogab kame kura den belej det kurun amu hekeb mel gore wor samunminj budam goyen kura pota yirde faran durnaying. Gogab kadom faran mata goyen tunjande ten hinaying. ¹⁵Go mata goke tenbe Al Kurunyen asande gahade katinj hi:

“Al kurabe budam yawaryinj gega, budam monj.

Munan al kurabe budam ma yawaryinj gega, iginde yawaryinj,” yitin
hi.

Yumulgan 16:18

Taitusya metenj kadomya

¹⁶Be, ne belej den ge dufay henj himyen gwahade po, Al Kurun belej dufay goyen go po Taitus binde kirying goke Al Kurun iginj nurd unen hime. ¹⁷Gobe nen belej hulyan irtin goyen iginj iren dinun, irde den hitte kun kun nin wilaknenj po nurde dufayminj sanj po kerde den hitte kwenj dinun geb, goke Al Kurun iginj nurd unen hime. ¹⁸Irde yenj kuyen goyenter kadnininj kura tenj kerteke Taitusya tumnan kuriryen. Kadnininj gobe Yesu ninj yitinj mere iginj goke metenj kenjela tenj hike Yesuyen alya bereya sios belej turun irde hanjen. ¹⁹Goyenbe go munj po monj. Al gobe nen belej al hoyan faran yurd yurd ninj sios belej hora gabu irtin goyen yuku yunen yunen metenj tininj titeke sios gore denja kun hitek albe

gago yen basina iramin geb, nenya kun hityen. Be, hora gabu irtin goyen yuku yunen yunen meten gobe Doyan Al Kurun denem turun yan irnin yenbe meten go ten hityen. Irde al faran yurd yurd dufay nin taren po hen hityen goyen al yikala yirnin yenbe gogo meten go ten hityen.

²⁰⁻²¹ Be, nenbe Doyan Al Kurunya alyat dilingde huwak mat mata ten ten nin kurut wor po yen hityen. Ningeb al faran yurd yurd nin aman dufayde hora gabu irtin kurun gayen doyan irde henyabe mongo al kura belen nen daha mat hora doyan irde hite goyen goke bulun mat tagal dunnak yenbe kenkela doyan irde hityen.

²² Be, Taitusya al goya kuren tikeyabe kadninin hoyan kura irem goya tumnan kunayin. Al gobe al faran yurd yurd nin dufay kurun po hen hiyen gobe belen hoyan mat hoyan mat kenen bebak tenbe fudinde ten hi yen nurde hityen. Irde den belen al faran yurd yurd meten goyen fudinde ten hinayin yen nurdeb denya hen meten go timewon wor po yen nurde hi.

²³ Be, Taitusbe den ge ten meten kadne hirin. Yenbe neya hen meten ten har. Irde kadninin irawa kura Taitusya irde den hitte kuriryen gobe gar nin Yesuyen aly bereya gor kutin yarabe al iraw gogo kun Yesu Kristu turun irtek meten ten hiriryen. ²⁴ Ningeb den belen al hoyan nin amanen nurde faran yurde han goyen mel karwo goyen yikala yirnayin. Irke den ge turun turun ten hityen goyen dahade nin gwaha ten hityen goyen kenen bebak tinayin. Irkeb Yesuyen aly bereya kurun gayen tumnan nurnayin.

Kadtiŋ Yesuyen aly bereya faran yurnayin

9 ¹ Be, Al Kurunyen aly bereya Yudia nana bana han goyen faran yurd yurd nin den goyen sopte mere dirtek yen ma nurde hime. ² Gobe den belen mel go faran yurtek po nurde han goyen nurde hime geb, gago dinen hime. Nebe matatin goke nigen ge turun turun ten hinhem. Irde den Akaia nana bana gon nin mar belen Yudia nanare nin mar goyen faran yurnin yen dama kun imoyenter hora gabu ird min uramin goyen Yesuyen aly bereya Masedonia nana bana gon nin mar momon yirmirin. Irkeb faran yurd yurd dufay taren gote merebe mel gore nurdeb al budam wor po bin harkeb al faran yurtek yen hora gabu iramin. ³ Goyenbe da misinde Taitusya kadom waranya goyen den hitte yad yermeke kuniŋ tahan? Gobe den belen al faran yurde han goke turun turun ten himyen goyen usi ten hi ninnak yenbe gago yad yermeke kuniŋ tahan. Gogab mel gore kun dinkeb ne belen dinmirin gwahade po horatin gabu irde pasi hen al faran yurd yurd nin gitik tinayin. ⁴ Goyenbe Masedonia nin al kura mere momonŋ tagalmeke nurtin mar goyen neya tumnan den hitte kunbe den goyen al faran yurd yurd nin gitik ma titin hike dennayinbe den ge hekken nurde momon yirmirin goke

memyak wor po nurej. Dej manaj fudinde goke memyak nurnayin geb, goke mere ma tiyen. ⁵Ningeb mata gwahade ma forok yewon yey nurdeb Taitusya kadam irawaya go wa den hitte kunbe bikken al faran yurd yurd nin aman dufayde hora gwahade yertek yey momon diramin goyen aranen yerde pasi irnayin yey hulyan yirde hime. Gwaha mat hora gabu irnayinbe al hoyan belej gwaha tinan dinkeya ga ma hora yernayin, dufaytinde wilaknen nurdeya yernayin.

⁶Mere ga dirde hime gote minbe gahade: al kura binje budam ma haryenbe iginen budam ma yawaryen. Munan budam haryenbe budam po yawaryen. ⁷Ningeb al kura hora gwahade keren yey nurdeb binje mat wilaknen nurdeya kiryen. Pinen hende ma kiryen. Irde al hoyan belej gwaha tiya inke goke kanduknen nurde kiryenbe igin mon. Al Kurunbe al kura amanen nurdeya detmin unen hiyen al goke po amanen nurde unen hiyen geb, gago dinen hime. ⁸Irde Al Kurun belej den goyen buninen dirde igin igin dirde hiyen gobe kurun wor po geb, den belej det kurun nurde hinayin kurun gobe yey belej dunen hiyen. Irkeb det kurun amu ma hen hinayin. Irde den belej meten igin daha kura titek nurde hinayin kurun goyen huginen igin ala ten hinayin. ⁹Ningeb goke tenbe Al Kurunyen asande gahade katin hi:

“Yenbe al kura det nin amu hen han mar aman dufayde detmin yunen hiyen.

Matamin huwakbe huginen hiyen,” yitin hi.

Tikin 112:9

¹⁰Ningeb Al Kurun belej yasun al binje muyken unke harke binje sasonen yirde unen hiyen gwahade goyen po, den belej mata huwak al faran yurd yurd belnen kurayen kurayen goyen Al Kurun belej dunenbe gote iginen wor budam forok yiryen. Mata huwaktin gobe gwaha mat kurun hen hiyen. ¹¹Fudinde, Al Kurunbe den belej huginen al budam faran yurde hinayin yenbe samun budam dunen hiyen. Gogab horatin nen belej yade yuntekeb al budam belej goke Al Kurun nin igin nurd unen hinayin. ¹²Den belej al faran yurd yurd meten go ten hikeb Al Kurunyen alya bereya det kurun amu hen hanjen gore yawarnayin. Goyenbe go mun po mon. Den faran yurde hinayin goke al budam Al Kurun nin igin wor po nurd unen hinayin. ¹³Den belej al faran yurd yurd meten go ten hikeb al hoyan nin amanen nurd yunen han gobe fudinde yey nurdeb Al Kurun turun irnayin. Irde Yesu Kristu nin yitin mere igin goyen fudinde yenbe gama irde han, irde horatinde mel goya al hoyan kurun goya goyen faran yurde han goke al budam Al Kurun turun irnayin. ¹⁴Irde Al Kurun belej buninen dirde igin igin dirde hi gobe kurun wor po goyen mel gore kenenbe den ge amanen nurd dunenbe den ge Al Kurun gusunan irde hinayin. ¹⁵Be, Al Kurun belej detmin igin damum mon dulin dunen hiyen gobe kurun wor po gwahade kura yetek mon goke Al Kurun igin wor po nurde unen hitek!

Pol niŋ buluŋ mat tagalde haŋ mar goke yiriŋ

10 ¹Be, deŋ haŋ bana goyen al kura beleŋ ne niŋ buluŋ mat yeke mere momoŋmiŋ nurmiŋ. Meremiŋbe gahade: “Polbe neŋya heŋyabe kafura dirde mere saŋiŋ ma dirde hiyen. Gega gisaw heŋbe asaŋdeb mere tareŋ po dirde hi,” yeŋ haŋyen. Deŋ beleŋ ne niŋ gwaha yeŋ haŋyen gega, ne Polbe Yesu Kristu beleŋ bekkeŋde igiŋ mat al mere yirde hinhin gwahade goyen po, ne wor matatiŋ goke mere direŋ tihim. ²Mel goreb neŋ gayen gake yeŋ, “Megen niŋ mata gama irde haŋ,” diniŋ haŋyen. Niŋgeb kuŋbe denya gwaha yeŋ haŋ mar goya tumŋaŋ saba tareŋ po direŋ yeŋ nurde hime. Goyenbe gwaha dirtek ma nurde hime geb, go teŋ haŋ mata gobe yubul po tinayiŋ yeŋ gago eseŋ mere dirde hime. ³Fuŋinde, neŋbe megen gar hite gega, Doyaŋ Al Kuruyen asogoya arde hityen gobe megen niŋ mar beleŋ arde haŋyen gwahade ma arde hityen. ⁴Fuleŋare niŋ detniniŋbe megen niŋ marte fuleŋare niŋ det gwahade moŋ. Hoyaŋ wor po. Fuleŋare niŋ detniniŋbe Al Kuruyen saŋiŋ miŋyaŋ geb, Al Kuruyen asogomde gasuŋde niŋ koya tareŋ wor po gobe det gore igiŋ upew urtek. ⁵Niŋgeb neŋbe gore po megen niŋ marte dufay kurayen kurayen goya yingēŋ ge turuŋ turuŋ teŋ teŋya goyen walde pasi kerde hityen. Mata gwahade goreb Al Kuruy nurd uney yeŋya awalikde heŋ heŋ goyen pet teŋ haŋyen geb, gogo pasi kerde hityen. Irdeb dufay kurayen kurayen al biŋde forok yeŋ haŋyen goyen yad fere titŋeŋ yirde Yesu Kristuyen dufay po gama irde hinayiŋ yeŋ yende yufukde po yerde hityen. ⁶Irde deŋ beleŋ Al Kuruyen mere keŋkela gama irde pasi heke gab meremiŋ gama ma irde haŋ mar goyen tumŋaŋ mata gote muruŋgem yuneŋ yuneŋ niŋ gitik titek. ⁷Goyenpoga deŋbe det hende hendem po yeneŋ miŋ ma bebak teŋ haŋyen. Niŋgeb al kura yingēŋ ge yeŋ, “Neŋbe Yesu Kristuyen al wor po,” yeŋ nurde haŋ, munaŋ neŋ ge yeŋbe, “Mel gobe Yesu Kristuyen al wor po moŋ,” yeŋ haŋ. Goyenbe mel goyen yingēŋ ge yeŋ, “Neŋbe Yesu Kristuyen al wor po,” yeŋ nurde haŋ kenem neŋ wor gwahade haŋ yeŋ nurd dunnayiŋ. ⁸Gobe Doyaŋ Al Kuruy beleŋ deŋne yaŋ niryiŋ gobe dufaytiŋ yeŋ ge tareŋ irtiŋ goyen buluŋ ird ird niŋ ma deŋne yaŋ niryiŋ, deŋ goyen saŋiŋ dird dird niŋ deŋne yaŋ niryiŋ geb, gago diniŋ hime. Niŋgeb deŋne yaŋ niryiŋ goke turuŋ turuŋ teŋ hime goke memya ma heweŋ. ⁹Ne asaŋ kaŋ heŋyabe deŋ beleŋ asaŋne yeneŋbe, “Pol beleŋ kafura henaŋ yeŋ asaŋ kaŋ duneŋ hiyen,” yeŋ ma nurd nunwoŋ yeŋ nurdeya kaŋ himyen. ¹⁰Gobe al kura beleŋ, “Polbe asaŋdeb mere tareŋ wor po al beleŋ nurde kandukŋeŋ nurtek mat kaŋ hiyen. Gega diliŋde deneybe mere keŋkela ma dirde hende hende po mere dirde hiyen,” yeŋ haŋyen geb, gago diniŋ hime. ¹¹Al gwaha yeŋ haŋ marbe neŋ beleŋ denya ma heŋ asaŋde kaŋ duneŋ hityen mere gobe dilniniŋde deney mohoyiniŋde mere teŋ hityen goya tuŋande yeŋ nurnayiŋ.

¹²Nenbe al kura nen nurhet nurhet ten han marya awalik hetek ma dirde hi. Irde go mar goya hen ganunbe igin, ganunbe bulun yetek ma dirde hi. Mel gobe yingen de dufay po gama irde al iginbe gwahade gwahade, munan al bulunbe gwahade gwahade yen nurdeb go hende huwarde yingen de mata yenen han yen geb, kukuwa wor po hitiyen han. ¹³Goyenpoga nenbe nindiken ge mali mali turun turun ma ten hityen. Al Kurun belen meten duntin goke po turun turun ten hityen. Al Kurun belen meten duntin bana gonbe den hitte kun meten titek wor gon po hi geb, den hitte kun meten ten hinhet goke turun turun ten hityen. ¹⁴Nen belen Yesu Kristu nin yitin mere igin goyen ten den hitte kutirin gobe nen belen epte ma kutekde ma kutirin. Denbe nen belen igin kun meten titekde po hinhan geb, gogo kutirin. ¹⁵Ningeb nen ma kun meten titekde kun al hoyan belen bikken meten titin goyen nen belen meten titin yen turun turun ma ten hityen. Gwaha titnenbe Yesu Kristu nin hekken nurd nurd mata goyen kurun hen hikeb nen belen den bana hen meten ten hityen goyen wor kurun wor po hewon yen nurde hityen. ¹⁶Gogab nan hoyan bana al kura belen meten min ma urtin de manan igin kun Yesu nin yitin mere igin goyen tagaltek. Gobe meten kura al hoyan belen bikken min urtin go hende meten ten goke turun turun titek ma dirde hi geb, gago dinen hime. ¹⁷Ningeb al kura turun turun tiye yenbe Doyan Al Kurun belen meten titin goke po gab turun turun tiyen. ¹⁸Gobe al kura goke igin inyen albe Doyan Al Kurun po, al yingenbe epte ma yingen ge turun turun ten hinayin geb, gago dinen hime.

Polya usi aposelya

11 ¹Be, nebe den belen nurde mun kura kukuwamnen yara nurd nunnayin mat mere kura diren tihim. Ningeb goke ma nurdeb nubul tike mere tiyen. ²Be, Al Kurunbe alya bereyamin belen yen ge ma nurde det hoyan nin kun hikeb goke bin ar yen hiyen gwahade goyen po, ne wor den belen det hoyan nin po nurde han goke bene ar yen hi. Be, bere fonen kura alya ma kun hitin gwahade goyen al kura mekerd unen han yen gwahade goyen po, den goyen al unkenen Yesu Kristu po mekerd unen yen bin timirin. ³Goyenpoga han kanya wor po unyum usi dufay kurun minyan gore Ewa usi irke mata bulunde katin gwahade goyen po, bitinde mat fudinde wor po Yesu Kristu nin nurde meten ten hinhan goyen tubul ten det hoyan nin nankenen kun hinak yen kafuram nurde himyen. ⁴Danin mere ga dinen hime? Gobe al kura den hitte wan nen belen Yesu nin momon dirtirin goyen ma momon dirdeb mere hoyan momon dirde han gega, goke bulunen ma nurde igin yen han geb, gago dinen hime. Irde Holi Spirit nen belen dunteke tamin goyen mon, mel gore hoyan wor po dunke fudinde yen han. Yesu nin yitin mere igin wor gwahade po, mel gore hoyan wor po dinke igin yen nurde han. ⁵Den hitte wan saba hoyan dirde

haŋ mar beley yingen ge yeŋ, “Neŋbe Yesuyen mere basan mar aposel karkuwan, irde aposel hoyan gote folek wor po,” yeŋ haŋ. Goyenpoga nebe mel gore epte ma fole nirtek haŋ yeŋ nurde hime. ⁶Fudinde, nebe al beley nurde kenkela bebak titek mat mere ten ten al mon. Gega nebe Al Kurunyen merebe kenkela wor po bebak ten himyen. Neŋbe gwahade ten hityen goyen belnen budam mat kenkela wor po dikala dirde hityen.

⁷Be, nebe Yesu nin yitin Al Kurunyen mere igin goyen den hitte tagalde hinhem gega, goke damu nirnayin ma dinen hinhem. Gobe neb mata gwaha mat nigenbe al denem mon hen denbe al denin yan dirmewon yeŋ nurdeb gogo ten hinhem. Goyenbe go ten hinhem gobe bulun ten hinhem yeŋ nurde haŋ? Mon, gwahade mon geb! ⁸Nebe den ge ten meten ten hinhemyabe nana hoyande nin sios beley faran nurde hora nunen hinhan. Ningeb nebe den faran durd durd nin tenbe mel gote hora kawen ten hime yeŋ nurde hinhem. ⁹Irde denya henyaabe det kuran nurdeb faran nurnan yeŋ gusunan ma dirde hinhem. Gobe kadne yago Masedonia nanare nin Yesuyen alya bereya kura beley det kuran amu hen hinhem goyen nunamin geb, den supahaktinde kanduk ma yerde hinhem gogo. Ningeb denya hinhetya faran nin gusunan ma dirde hinhem gwahade po, kame wor supahaktinde kanduk kura ma kerde hen. ¹⁰Ningeb supahaktinde kanduk kura ma kerde himyen goke turun turun ten himyen goyen den haŋ Akaia nana bana gon nin al kura beley epte ma utan nirnayin. Yesu Kristuyen mere fudindebe ne bana hi geb, fudinde wor po yeŋ hime. ¹¹Ga yeŋ hime gabe den ge amanen ma nurde dunen hime geb, gago yeŋ hime? Mon! Al Kurunbe ne beley den ge amanen nurde dunen hime goyen kenkela nurde hi!

¹²Nebe ten himyen gwahade po murungem mon meten ten hen. Gogab al kura yingen ge yeŋ, “Neŋbe Pol meten ten hi gwahade po ten hite,” yeŋ al momon yirde yingen ge turun turun ten ten belnen nin nankenen haŋ mar gote belemnin pet tiyen. ¹³Goyenbe dani gwaha tiyen? Gobe go mar gob usi aposel, al usi yird yird meten ten haŋ mar, irde al dilinde Yesu Kristuyen aposel fudinde yeŋ denwon yeŋ nurde usi mata ten haŋ mar geb, gogo yingen ge turun turun ten ten belemnin pet tiyen. ¹⁴Satan wor igin yingen Al Kurunyen miyon tarenmin turun yan goyen fakunde hen al dilinde forok yiyyen geb, usi aposel gore usi mata ten haŋ gobe det tinen mon. Ningeb goke kukuwamen ma nurde hime. ¹⁵Ningeb Satan gote meten mar gore al dilinde mata huwak nin meten ten haŋ mar yeŋ denwon yeŋ nurde usi mata ten hanyen goke hurunkat ma ten himyen. Matamin gote murungem bulunbe nalu funande yeŋ tetek go po tenayin.

Polbe kanduk yenen hinhin goke aman hiriŋ

¹⁶Be, sopte momon diren tihim: den haŋ bana goyen al kura ne nin yeŋ, “Polbe kukuwa,” ma yeŋ hinayin. Goyenbe kukuwa yeŋ nennayin

goyen wor igiŋ. Gote merem moŋ geb, ne kukuwa al gare nigen ge mun kura turuŋ turuŋ tiyeŋ goke buluŋeŋ ma nurd nunnayiŋ. ¹⁷Ga dineŋ hime gabe Doyaŋ Al Kuruŋ beleŋ mere nuntiŋ goyen ma dineŋ hime. Nebe deŋ beleŋ kukuwa al nineŋ haŋ gwahade goyen po, kukuwa al heŋbe gago nigen ge turuŋ turuŋ teŋ hime. ¹⁸Al budam wor po megen niŋ mata gama irde yingeŋ ge turuŋ turuŋ teŋ haŋyen geb, ne wor gwaha tiyeŋ. ¹⁹Deŋbe dufay wukkekniniŋ yaŋ yeŋ nurde haŋ. Gega kukuwa mar pel yirtekdebe go mar goke buluŋeŋ ma nurde haŋ geb, deŋ wor kukuwa wor po! ²⁰Deŋbe al kura beleŋ meteŋ marmiŋ dulŋeŋ dirde ingogaha dirde haŋ goke buluŋeŋ ma nurde haŋyen. Irde usi dirde dettiŋ komkom heŋ, dapŋa dirŋeŋ yara dirde uluŋtiŋyaŋ seŋ durde haŋyen gega, goke buluŋeŋ ma nurde haŋyen. ²¹Neŋbe saŋiŋniniŋ miŋmoŋ geb, deŋ beleŋ mata gwahade teŋ haŋyen gwahade ma teŋ hityen goke memyak nurde hime!

Goyenpoga al kura meteŋmiŋ goke turuŋ turuŋ tiyyeŋbe ne wor igiŋ meteŋne goke turuŋ turuŋ tiyeŋ. Mere dirde hime gabe sopte kukuwa yara heŋ mere dirde hime geb, ne niŋ yeŋ, “Yeŋbe al gwahade go,” yeŋ nurdeya ga merene nurnayiŋ. ²²Mel gobe yingeŋ ge yeŋ, “Neŋbe Hiburu mar,” yeŋ haŋ? Be, ne wor Hiburu mar al. Irde Israel mar yeŋ haŋ? Gwahade kenem ne wor Israel niŋ al. Irde Abrahamyen asem weŋ yeŋ haŋ? Ne wor Abrahamyen asem geb. ²³Irde mel gore Yesu Kristuyen meteŋ mar yeŋ haŋ? Ne wor Yesu Kristuyen meteŋ al gega, mel gote folek wor po. Ga dineŋ hime gabe kukuwa al beleŋ yeŋ hi yara dineŋ hime gega, fudinde dineŋ hime! Ne tareŋ po meteŋ teŋ himyen gobe yende folek. Irde meteŋ teŋ teŋ goke wawuŋ budam koyare hinhem gega, mel gobe wawuŋ budamde moŋ. Irde al beleŋ wawuŋ budam mununeŋ hike soŋ soŋ kamde hinhem gega, mel gobe gwahade ma hinhan. ²⁴Wawuŋ siptesoŋoŋde al beleŋ nukuŋ Yuda mar diliŋde nerke Yuda mar beleŋ kaŋde wawuŋ 39 gayen nusulak nirke soŋ kammiriŋ. ²⁵Irde wawuŋ karwore Rom mar beleŋ nukuŋ nukware mununamiŋ. Wawuŋ kurabe hora po mununamiŋ. Irde wawuŋ karworebe hakwa buluŋ hekeb soŋ kammiriŋ. Irde naŋkahal uŋkureŋya wawuŋ uŋkureŋya maybare hinhem. ²⁶Nebe naŋa kurayaŋ kurayaŋ kuŋ heŋyabe fe beleŋ soŋ nade hinhan. Irde al gasa yirniŋ yirniŋ yirde kawe yirde haŋyen mar beleŋ mununke soŋ soŋ kamde hinhem. Irde miŋniniŋ uŋkureŋ Yuda mar beleŋ mununke soŋ soŋ kamde hinhem. Al miŋ hoyaŋ beleŋ wor gwahade po nirde hinhan. Taunyaŋ heŋ, kurareb sawsawa po kuruŋ naŋa bana heŋ, kurareb makaŋ alare heŋbe soŋ kamde hinhem. Irde al kura Yesu nurd uneŋ hite usi teŋ haŋ mar gore buluŋ nirke soŋ kamde hinhem. ²⁷Nebe meteŋ kuruŋ po teŋ ulne misiŋ kuruŋ po kateŋ hinhem. Irde bindereŋ kanduk forok yeŋ hike wawuŋ kayaŋ teŋ himyen. Irde kurarebe biŋgeya feya niŋ kamde himyen. Irde kurarebe biŋge miŋmoŋ kuŋ himyen. Irde

kurareb ulne umŋam moŋ geb, meŋe niŋ soŋ kamde hinhem. ²⁸Kanduk kuruŋ yeneŋ hinhem go hendebe Yesuyen alya bereya sios kuruŋ goke manan dufay heŋbe hugineŋ kandukneŋ wor po nurde himyen. ²⁹Mel goyen kura yul yekeb ne wor yul yeŋ himyen. Irde al kura mata bulunđe katkeb goke bene misiŋ wor po nurde himyen.

³⁰Munan det kura goke turuŋ turuŋ tiye yewenbe tareŋnem moŋ goyen kawan ird ird det goke po gab turuŋ turuŋ teŋ heŋ. ³¹Doyaŋ Al Kuruniniŋ Yesu Naniŋ Al Kurunbe neŋ beleŋ hugineŋ turuŋ irde hitek al. Yeŋ beleŋ po gab mere dirde hime gayen usi yeŋ ma nurde hi. ³²Ne Damaskus taunde hinhemyabe gor niŋ doyaŋ al kuruŋ Aretasyen meten al beleŋ nad fere nire yeŋ fuleŋa marmin hulyan yirke nawarniŋ yeŋ taun gote hora koya kuruŋ gote yamere pet tiyamin. ³³Goyenpoga kadne beleŋ koya kuruŋ hende hoyan goyen yamenđe mat tiri bana nerde hulyanalde palgir nirke siŋare katen busaharmiriŋ.

12 ¹Be, kanduk kuruŋ bana hinhem goke tagalde turuŋ turuŋ teŋ hime gayen hendeb hoyan niŋ wor sopte turuŋ turuŋ tiyen tihim. Gwaha tiyen goke det igiŋ kura ma tewen gega, mata kura yuwarwarte yeneŋ himyen irde Doyaŋ Al Kurun beleŋ det banare hitiŋ nikala nirde hiyen goke tagalde turuŋ turuŋ tiyen. ²Be, Yesu Kristu niŋ dufaymin sanj irtiŋ al kura goyen nurde unen himyen.^b Al gobe dama 14 kuriŋ imoyenter Al Kurunyen gasunđe wor po Doyaŋ Al Kurun beleŋ teŋ hurkuriŋ. Goyenbe al mata go tiyyiŋ gobe fudinde hagen manan hurkuriŋ ma toneŋ po hurkuriŋ gobe bebakken ma nurde hime. Al Kurun po ga nurde hi. ³Goyenbe dinhem gwahade po, al goyen Al Kurun beleŋ gasunmin igiŋ mun wor pore gor teŋ hurkuriŋ gobe fudinde yeŋ nurde hime. (Goyenpoga hagen manan hurkuriŋ ma toneŋ po hurkuriŋ gobe bebakken ma nurde hime. Al Kurun po ga nurde hi.) ⁴Be, gor det nuriŋ gobe merere gwahade kura yetek moŋ goyen nuriŋ. Irdeb mere gobe al beleŋ epte ma tagaltek goyen nuriŋ. ⁵Ningeb nebe al gwahade goke gab turuŋ turuŋ tiyen. Gega nigen gebe epte ma gwaha tiyen. Munan gwaha tiye yenbe tareŋnem moŋ goke po gab turuŋ turuŋ tiyen. ⁶Ningeb nigen ge turuŋ turuŋ tiye yewen gega, al kura beleŋ goke kukuwa heŋ hi yeŋ ma nennayiŋ. Gobe mere fudinde po tiyen geb, gago dineŋ hime. Mongo nigen ge turuŋ turuŋ tiyen goyen po nurdeb mataneya mereneya yenenbe ne gayen al gwahade yeŋ nurtiŋyen han goyen pel irde denne isan wor po henak yenbe nigen ge turuŋ turuŋ ma tiyen.

⁷Goyenpoga Doyaŋ Al Kurun beleŋ nikala niryiŋ gobe igiŋ wor po, irde det hoyan fole wor po yirtiŋ geb, mongo goke yingen ge turuŋ turuŋ tiyyenkek yenbe garbam bulun kura ulner tubul tike hiyen. Garbam gobe Satanyen hulyan al yara heŋ ulne misiŋ kurun wor po nunen hiyen.

^b 12:2 Al gabe Pol beleŋ yingen ge yeŋ hi.

⁸Nebe garbam goyen Doyan Al Kurun belej tenj sina irwon yey wawun karwore gayen gusujan irde esen mere irmirin. ⁹Gega yey belej wol hejbe, “Tarengem mon hej hayen goyarebe tarejne kenkela wor po forok yey hiyen. Ningeb bunijen girde igin gin girde himyen gobe ge hitte kurun wor po hi geb, garbam goke gusujan ma nirayin,” ninyin. Ningeb mata damindebe sanjin ma hej himyen goke gab aman hende turun turun tiyen. Gogab Yesu Kristuyen tarej goyen ne bana hiyen. ¹⁰Gwahade geb, Yesu Kristu nin tenjbe kanduk kurun yenen himyen goke aman hej himyen. Mata daminde tarej ma hej himyen, al belej sukal nirde hanjen, det nin amu hej metenjen wor po nirde hiyen, irde al belej bulun bulun nirde hanjen gega, aman hej himyen. Gobe sanjin ma hemekeb yey belej tarej nirde hiyen geb, gogo aman hej himyen.

Polbe Korin nin mar tarej yird yird nin nuryin

¹¹Be, mere kukuwam mat tihim gabe dindiken tikeb mere gago tihim. Nebe al mali degnem mon gega, usi mar belej yingen ge yey, “Nenge aposel karkuwan. Aposel hoyan gote folek,” yey hanjen mar gore epte ma fole nirtek hime. Ningeb ne turun nirtek marbe fudinde den gogo gega, gwaha ma ten hanjen. ¹²Nebe den belej ne gayen aposel fudinde yey nenen bebak tinayin yey mata tinen turun yan Al Kurun belej po ga forok yirtek goyen budam forok yirde hinhem. Kanduk bana hinhem gega, goke mukku ma ten goya goya sanjin po huwarde hinhem. ¹³Nengeb nana hoyande nin sios goke meten ten himyen gwahade goyen po, den ge wor gwahade po ten himyen. Goyenpoga det unjukan kura gwaha ma timirin gobe faran nin gusujan ma dirmirin. Ningeb faran nurd nurd nin gusujan ma dirmirin goyen bulun dirmirin yey nurde han kenem halde nunnayin!

¹⁴Be, gayenterbe igin den hitte kun denen yey nurde hime. Gayenter kumekeb wawun karwo hiyyen. Gega kunbe faran nurnan yey kanduk kura supahaktinde ma kerej. Gobe det yawarmewon wor po yey nurde himyen gobe megen nin det mon, den al gogo po geb, gago dinen hime. Fudinde, dirin belej milin nanin faran yurd yurd nin hora ma yerde hanjen. Milin nanin belej gab dirinmin ge nurdeb gwaha ten hanjen. ¹⁵Nengeb detne kura hikeb tumnan yade gore po faran duren. Gore epte mon kenem den ge ten kamej wor igin yey nurde hime. Goyenbe den ge amanen nurd dunen teban dirde himekeb goke igin ma nurde nen ge bulunen nurd dunen han? Gobe kukuwamen wor po!

¹⁶Denbe gwaha ten han gega, neb han kapya denya henyabe supahaktinde kanduk kura ma yerde hinhem gobe fudinde wor po. Goyenpoga al kura belej ne nin yey, “Polbe usi dufaymin kurun wor po, irde usi dirde dettin yade hinhin,” yey han. ¹⁷Ne belej usi dirde samuntin yaware yey hulan alne kura ten kermeke kun samuntin kura

yawaryiŋ? Hubu wor po! ¹⁸Nebe Taitus teŋ kermeke deŋ hitte kuriŋ. Goya goyenbe kadne kura Yesu nurd untiŋ al wor Taitusya tumŋaŋ yaɗ yermeko kwaryum. Be, Taitus beleŋ kuŋbe usi dirde samuŋtiŋ kura yawaryiŋ? Hubu wor po! Yenya neyabe mata unŋkureŋ po teŋ haryen, irde dufay unŋkureŋ po kerde gama irde haryen goyen go ma nurde haŋ?

¹⁹Be, kadne yago, asaŋ gayen kapyay heŋ neŋ ge yeŋbe, “Polya kadomyabe uliŋde mere forok yetek goyen pet teŋ teŋ ge asaŋ gago kayhaŋ,” yeŋ nurde dunnayiŋ? Moŋ, gwahade moŋ. Neŋbe Yesu Kristu nurd untiŋ mar beleŋ Al Kurun diliŋ mar mere teŋ hanŋyen gwahade po, mere dirde hite. Irde neŋ metetiŋ teŋ hityen kurun gobe deŋ tareŋ dird dird niŋ metetiŋ teŋ hityen. ²⁰Be, nebe deŋ goyen al gwahade hewon yeŋ nurdeya deŋ hitte kweŋ gega, moŋgo ne nureŋ gwahade ma denetiŋ yeŋ goke kafura heŋ hime. Irde deŋ beleŋ ne gayen al gwahade hewon yeŋ nurde haŋ gega, kumekeb gwahade ma nennayiŋ goke kafura heŋ hime. Deŋ haŋ bana goŋbe kadom mohoŋde teŋ, al kura kadom igiŋ mat hiki yeneŋ goke igiŋ ma nurde, bearar teŋ, kudiŋ mata teŋ, sukal yirde, kadomde mere momoŋ igiŋ moŋ goyen tagalde tukun, yingetiŋ ge turun turun teŋbe keperd keperd mata goyen bulun irde haŋ daw yeŋ nurde kafura heŋ hime. ²¹Kame deŋ hitte sopte kuŋ saba dirmeke Al Kurun beleŋ deŋnem moŋ niryeŋ yara deŋ beleŋ merene pel irnayiŋ yeŋ kafura heŋ hime. Irde bikkeŋ mata wukkeŋ moŋya leplep matayabe dufay bulun gama ird ird mataya teŋ hinhan mar budam Yesu niŋ dufaymiŋ tareŋ iramiŋ gega, mata bulunmiŋ go ma yubul teŋ Al Kurun niŋ biŋ mulgaŋ ma hekeb goke bene misiŋ wor po nirde hi.

Mere funaŋ

13 ¹Be, gayenter sopte deŋ hitte kumekeb wawun karwo hiyyeŋ. Irdeb, “Al kura merem yaŋ ireŋ yeŋbe al gote merebe fudiŋde yetek al irawa ma karwo gwahadem yaŋ hinayiŋ,” yeŋ hanŋyen goyen po gama irde deŋya gabu heŋ kandukniniŋ kurun goyen yunŋkureŋ yunŋkureŋ sope irtek yeŋ nurde hime. ²Nebe haŋkapyay wor po deŋ hitte kuŋ go kamereb sopte kuŋ mata bulunŋtiŋ goke saba dirde hayhay dirmiriŋ. Niŋgeb deŋya neŋya tumŋaŋ ma hite gayenter wor sopte gahade hayhay dirde hime. Hayhay dirde hime gabe deŋ po moŋ, al hoyan kura deŋya tumŋaŋ haŋ mar goyen wor hayhay yirde hime. Merenebe gahade: kame sopte deŋ hitte kuŋ mata bulun gwahade po teŋ haŋ marbe go ma yeneŋ wasak tiyeŋ. ³Yesu Kristu beleŋ mere nirke basaŋ heŋ mere dirde himyen goyen fudiŋde ma usi niŋ gusuŋaŋ nirde haŋ geb, keŋkela po dikala direŋ. Yesu Kristube matatiŋ sope yire yeŋbe mali mali ma sope yiryetiŋ, deŋ kafura hetek mat saŋiŋ po sope yiryetiŋ. ⁴Fudiŋde, yeŋbe al po heŋ tareŋ miŋmoŋ hiriŋ geb, kuruse hende mayke kamiŋ. Gega Al Kurun beleŋ tareŋmiŋde sopte isaŋ hiriŋ. Yesube al heŋ tareŋ miŋmoŋ hiriŋ

gwahade po, neŋ wor saŋiŋniniŋ miŋmon. Gega Al Kurunyen tarende Yesuya heŋbe matatiŋ sope yird yird metenbe saŋiŋ po titek.

⁵Be, dufaytiŋ Yesu Kristu niŋ tareŋ irtiŋ goyen saŋiŋ po tanarde mata teŋ haŋ ma dahade goyen dindiken keŋkela yeneŋ hinayiŋ. Yesu Kristube denya haŋ goyen go ma nurde haŋ? Ma nurde haŋ kenem denbe soŋ wor po hitiŋ mar geb! ⁶Gega den belegenbe neŋ gayen kura muŋ soŋ ma hitiŋ goyen denen bebak tinayiŋ yeŋ nurde goke doyaŋ heŋ hime. ⁷Neŋbe den belegen mata buluŋ kura ma tinayiŋ yeŋ Al Kurun gusuŋaŋ irde hityen. Gega gwahade gusuŋaŋ irde hityen gobe den ge meten igiŋ po teŋ hinhet goyen al yikala yiren yeŋ gusuŋaŋ irde hityen mon. Gwaha titneŋbe neŋ meten teŋ hityen gayen igiŋ mon yeŋ al belegen yennayiŋ goke ma nurdeb den goyen mata huwak teŋ teŋ ge po Al Kurun gusuŋaŋ irde hityen. ⁸Gobe mere fudinde asogo ird ird niŋ epte ma mata kura titek, irde mere fudinde goke po meten titek niŋgeb, gago dineŋ hime. ⁹Neŋbe tareŋniniŋ miŋmon hiteke denbe tareŋ heŋ haŋ goke amaŋen nurde hityen. Irde den goyen mata huwak po teŋ matatiŋde buluŋ kuram mon hinayiŋ goke Al Kurun gusuŋaŋ irde hityen. ¹⁰Goke teŋbe denya gisaw gisaw himeya gayenter asaŋ gago kaŋ hime. Gogab asaŋne keneŋ mata buluŋtiŋ yubul tinayiŋyen geb, kame den hitte kuŋ matatiŋ sope yire yeŋbe Doyaŋ Al Kurun belegen saŋiŋmiŋ nuntiŋ go hende hitem po ma mere direŋ. Be, tareŋ nunyiŋ gobe den tareŋ dird dird niŋ nunyiŋ, buluŋ dird dird niŋ ma nunyiŋ.

¹¹Be, kadne yago, mere ga pasi ireŋ tihim geb, igiŋ po teŋ hinayiŋ. Mata buluŋtiŋ sope yird yird niŋ kurut yeŋ hinayiŋ. Gwaha teŋ hinayiŋ yeŋ eseŋ mere dirhem gayen dufay heŋ hinayiŋ. Irde kadamde mere nurd gunen teŋ hinayiŋ. Irde bitiŋ kamke kadtiŋya awalikde hinayiŋ. Irde den goyen bubulkuŋne wor po yeŋ nurde dunenbe bitiŋ yisikamde hiyen al Al Kurun gobe denya hiwoŋ yeŋ nurde hime. ¹²Irde Al Kurun diliŋde wukken dinyen mat kadam gargar gird teŋ hinayiŋ. ¹³Al Kurunyen alya bereya gar haŋ mar tumŋaŋ den ge dufay heŋ haŋ goyen momon yirayiŋ ninkeb gago momon dirde hime.

¹⁴Be, Doyaŋ Al Kurun Yesu Kristu belegen buniŋen dirde igiŋ igiŋ dirde hiwoŋ. Irde Al Kurun belegen den goyen bubulkuŋne wor po yeŋ nurde dunen hiwoŋ. Irde Holi Spirit belegen den kurun goya tumŋaŋ awalikde hiwoŋ yeŋ gusuŋaŋ yirde hime. Gog po.